

Ilisimasortat il.il. pillugit Kalaallit Nunaanni nalunaarut

Peqqussummi nr. 985, 24. august 2015-imeersumi § 8, imm. 3, § 12, imm. 2, § 17, imm. 1 aamma 2, aamma § 34, imm. 4 malillugit Kalaallit Nunaanni atuutilersinneqartumi ilisimasortat pillugit inatsisip ilaanut ima aalajangersaasoqarpoq:

Kapitali 1

Atuuffia aamma nassuiaatit

§ 1. Nalunaarut Kalaallit Nunaata imartaani ilisimasortannorgniat-id-kortiannik aamma ilisimasortanut allagartamik uppernarsaammik atulersitsinermi atorineqassaaq.

§ 2. Nalunaarummi uani makku imatut paasineqassapput:

- 1) Ilisimasortaq: Ilisimasortatut Søfartsstyrelsenimit allagartaqarluni uppernarsaateqartoq.
- 2) Ilisimasortatut allagartaq uppernarsaat: Søfartsstyrelsenimit allagartaq uppernarsaat, ilisimasortaaffigisinnaasat erseqqinnerusumik taallugit allagartalimmut piginnaatitsissut.
- 3) Ilisimasortatut sulineq: Umiarsuup naalagaanik aqutissaq, angalaneq aamma aquneq pillugit siunnersuineq, siunnersuineq umiarsuarmi imaluunniit umiarsuarmit allamit nunamilluunniit ingerlanneqaralarpat.
- 4) Sumiiffik ilisimasortaaffigisassaq: Immap/nunap assingani sumiiffik, ilisimasortatut allagartaq uppernarsaat malillugu ilisimasortap ilisimasortaaffigisassatut piginnaatitaaffigisaa.
- 5) Ilisimasortannorgniat: Inuk ilisimasortaalernissamut sungiusarneqartutut Søfartsstyrelsenip akuerisaa.
- 6) Ilisimasortannorgniat id-kortia: Søfartsstyrelsenimit uppernarsaasiussaq, taassuminnga piginnittoq ilisimasortaalernissamut ilinniartinneqarpoq, sanilimik ilitersorneqarluni ilinniartitsinermut peqataanissamut piginnaatitsissut.
- 7) Nunarsuup kaaviffiisa sikuiuitsortaasa eqqaanni sumiiffiit: Sumiiffiit, International Code for Ships Operating in Polar Waters (Polar Code) malillugu sikuiuitsuni sumiiffiit.
- 8) Sanilimik ilitersorneqarluni ilinniartinneqarneq: Misiliisarluni imaluunniit simulatori atorlugu ilisimasortaasuusarluni ilisimasortatut ilinniartinneqarneq, ilisimasortamit sumiiffimmi ilisimasortaaffigisassami ilisimasortassatut akuerineqarsimasumit ingerlanneqartussaq. Sumiiffiinni ilisimasortaaffigisassatut qinnutigineqarsimasuni ataasiakkaani sanilimik ilitersorneqarluni ilinniartinneqarneq ulloq unnuarlu ataatsip ingerlanerani annerpaamik ataasiarluni ingerlanneqartassaaq.

Kapitali 2

Ilisimasortatut allagartaq uppernarsaat

§ 3. Søfartsstyrelsen qinnuteqaateqartoqarsimappat ilisimasortatut allagartamik uppernarsaammik atulersitsissaaq, qinnuteqaateqartoq:

- 1) imatut qaffasissusilimmik ilinniartitaareersimappat, umiarsuup angissusaa apeqqutaatinnagu qinnuteqaateqartoq umiarsuarmi naalagaasinnaappat (umiarsuarmi naalakkatut soraarummeersimappat),

- 2) naleqquttumik umiartornermi ukiut arlallit umiarsuup naalagaatut imaluunniit aquttuunertut misilittagaqarsimappat, matumani sivikinnerpaamik ukiuni marlunni umiarsuarni 500 BT-inik qaangerluguluunniit angissusilinni umiarsuup naalagaatut aquttuunertulluunniit misilittagaqarsimappat,
- 3) immap assingi elektroniskiusut (ECDIS) naammattumik ilisimasaqarfigalugit uppersarsinnaappagu,
- 4) atuuttumik oqaaseqaatitaqanngitsumillu peqqissusermut uppersaateqarpat, taamaattorli tak. imm. 4,
- 5) ilisimasortatut ilinniartitaaneq naammassisimappagu, tak. kapitali 4,
- 6) sanilimik ilitsersorneqarluni naammassilluni ilisimasortatut ilinniartinneqarsimappat, tak. kapitali 5,
- 7) sumiiffimmi ilisimasortaaffigisassatut qinnuteqaateqarfiusumi immikkut ittumik paasisimasaqarpat misilittagaqarpallu, tak. kapitali 3,
- 8) teoriimik suliatigullu piukkunnassusermut misilitsinneq qaqisiffigisimappagu, tak. kapitali 6, aamma
- 9) Kalaallit Nunaannut peqqussut atuutilersinneqarsimasoq malillugu ilisimasortat pillugit inatsisip ilaani, § 24, imm. 4 malillugu ilisimasorta qarfirmut nalunaarsugaasumut attuumassuteqarpat.

Imm. 2. Imm. 1, nr. 1-2-mi malittarisassanit Søfartsstyrelseni immikkut ittumik akuersissuteqarsinnaavoq. Taamaattorli umiarsuit ilisimasortap ilisimasortaaffigissallugit pikkorissuseqarfiginngisai pillugit ilisimasortatut allagartamik uppersaammik atulersitsisoqanngisaannassaaq.

Imm. 3. Ilisimasortatut allagartami uppersaammik allassimassaaq sumiiffiit ilisimasortaaffigisassat sorliit pineqartup ilisimasortaaffigissallugit piginnaatitaaffiginerai.

Imm. 4. Imm. 1 nr. 4 malillugu peqqissusermik uppersaateqarpat, taava paasisutissanik amerlanerusunik Søfartsstyrelseni piumasaqarsinnaavoq qinnuteqaateqartoq ilisimasortatut suliasamik ingerlataqarsinnaanersoq nalilersorumallugu.

§ 4. Ilisimasortatut allagartaq uppersaateqarpat elektroniskiusoq ilanngussaq 1-imi aalajangersakkat malillugit ilusilerneqassaaq.

Imm. 2. Ilisimasortaq sumiiffimmik ataatsimik ilisimasortaaffigisassaqarpat, tak. ilanngussaq 3, taava ilisimasortatut uppersaateqarpat ilisimasortap 70-inik ukioqalernissaata tungaanut atuutissaaq, tamatumalu kingorna ukiut tallimakkaarlugit qinnutigineqaqqittassalluni.

§ 5. Ilisimasortap nalilerpagu sumiiffimmi najukkami misilittagareqqusaasut attatiinnarnissaat ajornarsisimasoq, taava ilisimasortaq piffissap allagartaqarfiup naannginnerani sanilimik ilitsersorneqarluni ilinniartitsinermut peqataanermigut misilittagaqalersinnaavoq, tak. ilanngussaq 3.

Kapitali 3

Ilisimasortassanngornianut piumasaqaatit

§ 6. Ilisimasortanngorniat id-kortissaannik qinnuteqaatoqarsimappat elektroniskimik Søfartsstyrelseni atulersitsisinnaavoq, ilisimasortanngorniat § 3, im. 1-imi, nr. 1, 2 aamma 4-mi piumasaqaatit naammassisimappagit, kiisalu ukiuni kingullerni tallimani nunarsuup kaaviffiisa sikuiuitsortaasa eqqaanni sumiiffinni minnerpaamik ulloq unnuarlu 360-ini angalasimanermik uppersaateqarpat, taakkuninnga Kalaallit Nunaata aningaasarsiornikkut imartaani imaluunniit Kalaallit Nunaata imartaani minnerpaamik ulloq unnuarlu 180-ini angalasimanermut uppersaateqarpat.

Imm. 2. Uppersaateqarpat imm. 1-imi pineqartoq minnerpaamik ukuninnga imaqaasaq:

- 1) Qanoq sivisutigisumik umiartorsimaneq pillugu umiartornermut uppersaateqarpat assigisaaluunniit.
- 2) Qinnuteqartup ilinniarsimanerminut qaffasisusaa (umiarsuup naalagaatut soraarummeersimaneq).
- 3) Kalaallit Nunaanni umiartorsimanerminut misilittagaqarneq pillugu immersugassaaq, taanna Søfartsstyrelsenip nittartagaaniippoq.

Imm. 3. Kalaallit Nunaanni umiartorsimanerminut misilittagaqarneq, imm. 1-imi piumasaqaat tamakkerlugu naammassineqarsimangitsoq, piviusumik naliliineq tunngavigalugu sanilimik ilitsersorneqarluni ilinniartinneqarnermik taarserneqarsinnaavoq.

Imm. 4. Ilisimasortanngornianut, ukiuni tallimani kingullerni ingerlaavartumik akuersissuteqarluni ilisimasortaasimasumut aamma Kalaallit Nunaata imartaani taamaallaat killilimmik imaluunniit umiartornermik naleqquttumik misilittagaqanngitsumut § 9-mi malittarisassat atuupput.

§ 7. Ilisimasortanngornianut id-korti elektroniskiusoq ilanngussaq 1 malillugu suliarineqassaaq.

Imm. 2. Ilisimasortanngornianut id-korti ukioq ataasiakkaarlugu atulersinneqartassaaq.

Kapitali 4

Ilisimasortatut ilinniartitaanermut piumasaqaat

§ 8. Ilinniartitaaneq, § 3, imm. 1, nr. 5-imi taaneqartoq tulliuutunik imaqarpoq:

- 1) Bridge Ressource Management aamma Emergency Training pillugit ilisimasortanut pikkorissarnerit.
- 2) Ilisimasortat umiarsuarmik ingerlaartumik aqutsisinnaanerit.
- 3) Ilisimasortanut ilisimasortaaneq pillugu inatsisilerineq.
- 4) IMO Polar Code pillugu pikkorissarneq (Advanced/Qaffasissumik ineriartortitaq).
- 5) Ilisimasortanut inuttut isumannaatsuunissaq pillugu pikkorissarneq.

Imm. 2. Pikkorissarnerit qulaani taaneqartunut piumasaqaatit ilanngussaq 2-mi allaaserineqarput.

Imm. 3. Pikkorissarnerit, imm. 1, nr. 1-4-imi taaneqartut minnerpaamik ukiut tallimakkaarlugit ingerlanneqartassapput, imm. 1, nr. 5-imi pikkorissarneq taaneqartoq minnerpaamik ukiut pingasukkaarlugit ingerlanneqartassalluni.

Imm. 4. Ilisimasortaartitsiviup helikopteri aalajangiinermi imaluunniit peersinermi atortarpagu, isumannaatsumik ingerlanneqarnissaa qulakkeerniarlugu ilisimasortap naleqquttumik sungiusarneqarsimanissaa ilisimasortaartitsiviup qulakkiissavaa.

§ 9. Ilisimasortanngorniaq, akuersissuteqarluni ingerlaavartumik ukiuni kingullerni tallimani ilisimasortaasimasooq, kisianni Kalaallit Nunaata imartaani umiartorsimanermik uppersaasannaanngitsoq tak. § 6, imm. 1 malillugu sumiiffik ilisimasortaaffigisassami 5-imi ilisimasortatut akuersissummik atulersitsivineqarsinnaavoq, tak. ilanngussaq 3, ilisimasortanngorniaq ilinniarnert ataani taaneqartut naammassillugit ingerlappagit kiisalu teoriimik suliatigullu piukkunnassusermut misilitsinneq qaqsiffigisimappagu:

- 1) Kalaallit Nunaanni ilisimasortanut simulatori atorlugu ilisimasortaasuusaarnermik pikkorissarneq, matumani Issittumi pissutsit pillugit radarikkut pikkorissarneq.
- 2) Kalaallit Nunaanni sikoqarneq aamma sila pillugit pissutsinik ilisimasortanut pikkorissarneq.
- 3) Kalaallit Nunaanni immap assingisa qanoq issusaat pillugit ilisimasortanut pikkorissarneq.
- 4) Ilisimasortatut ilinniartitaaneq tak. § 8.
- 5) Minnerpaamik ulluni 30-ni Kalaallit Nunaata imartaa pillugu sanilimik ilitsersorneqarluni

ilinniartinneqarneq

Imm. 2. Qulaani taaneqartunut pikkorissarnernut piumasaqaatit ilanngussaq 2-mi allaaserineqarsimapput.

Imm. 3. Ilisimasortatut ilinniartitaanerup ingerlarnga imm. 1 malillugu Søfartsstyrelsenimit akuerineqassaaq.

Imm. 4. Ilisimasortatut allagartamik uppenarsaammik atulersitsisoqareerpat ilisimasortaaffiit siulliit 30-t, ilisimasortaq ukiuni kingullerni tallimani ingerlaavartumik Kalaallit Nunaata imartaani ilisimasortatut allagartamik uppenarsaateqarsimasoq ilagalugu ingerlanneqassapput, tamatumalu kingorna sumiiffiit ilisimasortaaffigisassat allat pillugit ilisimasortatut allagartamik uppenarsaammik qinnuteqartoqarsinnaavoq.

Kapitali 5

Sanilimik ilitsersorneqarluni ilinniartitsineq

§ 10. Sanilimik ilitsersorneqarluni ilinniartitsineq ilisimasortamit sumiiffimmi ilisimasortaaffigineqartumi ilisimasortatut allagartamik uppenarsaateqartumit ingerlanneqartassaaq aamma ima annertussuseqassaaq sivissuseqassallunilu pitsaasumik ilikkariartorneq qulakkeerneqarsalluni.

Imm. 2. Sumiiffimmi ilisimasortaaffinnut assigiinningsunik suussusilinnut sanilimik ilitsersorneqarluni ilinniartitsinermut piumasaqaatit ilanngussaq 3-mi allassimapput.

Imm. 3. Ilisimasortannorgniartoq ilisimasortatut allagartamik uppenarsaammik tunineqannginnerani Kalaallit Nunaata aningaasarsiornikkut imartaani imaluunniit Kalaallit Nunaata imartaa pillugu sanilimik ilitsersorneqarluni ilinniartitsinerit minnerpaamik 10-t naammassisimassavai. Taamaattorli sanilimik ilitsersorneqarluni ilinniartitsinneqarnermi Kalaallit Nunaata imartaani sumiiffimmi ilisimasaqalernerneq naammassineqassaaq, tak. ilanngussaq 3.

Imm. 4. Søfartsstyrelseni ilisimasortannorgniap siusinnerusukkut misilittagarisimasaanik piviusumik nalilileereerluni sanilimik ilitsersorneqarluni ilinniartitsinerit amerlassusissaat pillugu piumasaqaammik naleqqussaasinnaavoq. Nalilersuineq tunngaviit tulliuttut aallaavigalugit ingerlanneqassaaq:

1) Qinnuteqartup Kalaallit Nunaata imartaani imaluunniit nunarsuup kaaviffiisa sikuiuitsortaasa eqqaanni imartani angalanermut nalinginnaasumik misilittagai.

2) Qinnuteqartup sumiiffimmi ilisimasortaaffissatut qinnutigineqartumi angalasimanermut misilittagai.

3) Pissutsit allat pingaarutillit, matumani qinnuteqartoq ilisimasortatut misilittagaqarnersoq.

§ 11. Søfartsstyrelseni sanilimik ilitsersorneqarluni ilinniartitsisoqarsimatinnagu sumiiffimmut ilisimasortaaffissamut teoriimik piukkunnassusermut misilitsinermut akuersissuteqarsinnaavoq, sumiiffimmi ilisimasortaaffigineqartussamut ilisimasortaq allagartamik uppenarsaatilik pissarsiarineqarsinnaanngippat.

Imm. 2. Akuersissut taamaallaat tunniunneqarsinnaavoq sumiiffimmi ilisimasortaaffigineqartussami tallimanik taakkuninngaluunniit ikinnerusunik ilisimasortaqarpat allagartaqarlutik uppenarsaatilinnik.

Imm. 3. Ilisimasortaq, sumiiffimmut ilisimasortaaffigissallugu akuersissummik qinnuteqartoq, ukiuni kingullerni tallimani tassani ingerlaavartumik ilisimasortaasinnaanermut allagartamik uppenarsaateqassaaq, tak. ilanngussaq 3.

§ 12. Ilisimasortannorgniaq sumiiffimmi ilisimasortaaffigisassatut qinnutigineqartumut sanilimik ilitsersorneqarluni ilinniartinneqassaguni ilisimasortannorgniaq imaluunniit ilisimasortaq ilisimasortaartitsivimmumut, ilisimasortaanermik isumaginnittumut, saaffiginnissaaq.

Imm. 2. Ilisimasortaartitsivik piffissap naleqquttup iluani sumiiffimmi ilisimasortaaffissaq sanilimik ilitsersorneqarluni ilinniartitsivissatut kissaatigineqartoq pillugu ilisimasortaaffigineqartussaaq ilisimaneqarpat piffissamik sanilimik ilitsersorneqarluni ilinniartitsivissamik innersuussissaaq.

Imm. 3. Ilisimasortannorgniaq imaluunniit ilisimasortaq, sanilimik ilitsersorneqarluni ilinniartinneqarnissamik kissaateqartoq, tamatuma kingorna nammineq umiarsuaateqarfik

saaffigissavaa, ilumut sanilimik ilitsersorneqarluni ilinniartinneqarnissamik kissaatigineqartoq ingerlanneqarsinnaanersoq.

Imm. 4. Ilisimasortannorgniap imaluunniit ilisimasortap, sanilimik ilitsersorneqarluni ilinniartinneqarnissamik kissaateqartup, umiarsuarmi aamma ilisimasortaqaqtitsivimmi sanilimik ilitsersorneqarluni ilinniartinneqarnerup ingerlanneqarneranut atatillugu aningaasartuutit nammineq akilissavai.

Imm. 5. Ilisimasortaqaq taamaallaat ilisimasortannorgniamik ataatsimik, umiarsuup qaavani pigaartutut sulinermi ataatsimi sanilimik ilitsersorneqarluni ilinniartitsinermik ingerlatsisinnaavoq. Aamma tamatuma saniatigut sanilimik ilitsersorneqarluni ilinniartitsisarneq ilisimasortannorgniat ataasiakkaat akornanni assigiimmik agguataarlugu ingerlanneqartarnissaa ilisimasortaqaqtitsiviup qulakkiissavaa.

Imm. 6. Ilisimasortaqaqtitsiviup ilisimasortannorgniap imaluunniit ilisimasortaqaq ilisimasortaqaqtitsivik allameersoq sanilimik ilitsersorneqarluni ilinniartitsinermut peqataanissaanut itigartittassanngilaa.

Kapitali 6

Ilisimasortatut allagartamik uppersaateqalernissamut piukkunnassusermut misilitsinneq

§ 13. Ilisimasortannorgniap naggartaarutaasumik piukkunnassusermik misilitsinnermi teoriitaanik misilitsinnani, ilisimasortaqaqtitsiviup aamma ilisimasortannorgniap akisussaaffigalugu nalilersussavaat ilisimasortannorgniap naammattumik sanilimik ilitsersorneqarluni ilinniartinneqarsimanersoq, taamaalilluni umiartornermi isumannaallisaaikkut illersorneqarsinnaasumik ilisimasortaasinnaalerluni.

Imm. 2. Suliatigut piukkunnassusermut misilitsinneq, ilanngussaq 4-mi allaaserineqartoq, sumiiffimmi ilisimasortaaffigisassami ataatsimi qinnutigineqarsimasumi ilisimasortaaneruvoq ataaseq, taannalu teoriimik piukkunnassusermut misilitsinneq sioqqullugu ingerlanneqassaaq. Suliatigut piukkunnassusermut misilitsinneq atuutissaaq, Kalaallit Nunaata imartaani ilisimasortaannissamut ilisimasortatut allagartaq uppersaateqarpat.

Imm. 3. Teoriimik piukkunnassusermut misilitsinneq akunnerit 4-t missiliorlugit sivissuseqartarpoq, taanna ilanngussaq 4-mi allaaserineqarsimavoq. Teoriimik piukkunnassusermut misilitsinneq sumiiffik ilisimasortaaffigisassaaq pillugu sanilimik ilitsersorneqarluni ilinniartinneqarsimanerup naammassinerata kingorna kingusinnerpaamik ukiup ataatsip qaangiunnerani ingerlanneqassaaq.

Imm. 4. Piukkunnassusermik misilitsinnermut peqataassaaq soraarummeersitsisoq, taanna sumiiffimmi ilisimasortaaffisami ilisimasortatut allagartamik uppersaateqarluni ilisimasortaavoq aamma aallaavittut ilisimasortannorgniap pineqartup sanilimik ilitsersorneqarluni ilinniartinneqarneranut peqataasimasooq kiisalu censori Søfartsstyrelsenimit toqqarneqarsimasooq.

Imm. 5. Ilisimasortannorgniap piukkunnassusermik misilitsinneqarfissap piffissaa sumiiffissaalu siunnersuutigissavai aamma aningaasartuutit piukkunnassusermik misilitsinnermut atassuteqartut akilissallugit, matumani piareersarneq, akunnermut akissarsiat aamma angalanermut aningaasartuutit il.il.

Kapitali 7

Pineqaatissiissutit

§ 14. Inuk §§ 8, imm. 4-mi, aamma imm. 12-imi, imm. 2-mi aamma imm. 5-imi aalajangersakkanik unioqqutitsisoq Kalaallit Nunaanni pinerluttulerineq pillugu inatsit malillugu pineqaatissinneqassaaq.

Imm. 2. Ingerlatseqatigiiffiit il.il. (ataatsimoortutut inatsiseqartitsinikkut nammineertut) Kalaallit Nunaanni pinerluttulerinermi inatsimmi kapitali 5-imi malittarisassat naapertorlugit pinerluttulerineq pillugu inatsiseqartitsinermi akisussaaffilerneqarsinnaapput.

Kapitali 8

Pillaasarneq pillugu aalajangersakkt

§ 15. Pineqartoq Kalaallit Nunaanni najugaqanngippat imaluunniit pineqartoq inuiaqatigiinnut kalaallinut atanera annikinneruppat, Kalaallillu Nunaanni pinerluttulerinermi inatsimmi pineqaatissiissutissat atornissaannut tunngavissaqanngippat, suliaq Danmarkimi suliasanngortinneqarsinnaavoq imaluunniit malersugassanngorlugu innersuussutigineqarsinnaalluni, tak. Kalaallit Nunaanni pinerluttulerinermi inatsimmi § 7.

Imm. 2. Pisuni imm. 1-imi taaneqartuni, §§ 8, imm. 4-mik, aamma imm. 12-istik, imm. 2-mik aamma imm. 5-istik unioqutitsinerit akiliisitaanermik imaluunniit ukioq ataaseq tikillugu parnaarussaaneermik pillarneqaataasinnaavoq.

Imm. 3. Ingerlatseqatigiiffiit il.il. (ataatsimoortutut inatsiseqartitsinikkut nammineertut) Kalaallit Nunaanni pinerluttulerinermi inatsimmi kapitali 5-imi malittarisassat malillugit pillaneq pillugu akisussaatinneqarsinnaapput.

Kapitali 9

Atuutilersitsineq aamma ikaarsaariarnermut aalajangersagaq

§ 16. Nalunaarut atuutilersinneqarpoq ulloq 1. juli 2023.

Imm. 2. Ilisimasortaneq il.il. pillugit Kalaallit Nunaannut nalunaarut nr. 1698, 11. december 2015-imeersoq atorunnaarsinneqarpoq.

§ 17. Kalaallit Nunaannut nalunaarut nr. 1698, 11. december 2015-imeersoq malillugu ilisimasortatut il.il. allagartat uppersaatait atulersinneqarsimasut ulloq 31. december 2023-p tungaanut atuutissapput.

Imm. 2. Ilisimasortatut allagartat uppersaatait imm. 1 malillugu, taamaallaat sumiiffinnut uppersaamma allasimasunut atuupput, tassalu sumiiffimmi ilisimasortaaffissamut tamarmut atuunnani, tak. ilanngussaq 3.

Imm. 3. Sumiiffik ilisimasortaaffissaq tamaat ilisimasortaaffiginiaraanni tak. ilanngussaq 3, taava ilisimasortatut allagartamik uppersaammik piginnittoq tak. imm. 1, sumiiffik ilisimasortaaffissaq pineqartoq pillugu teoriimik piukkunnassusermut misilitsinneq angusiffigisimassavaa ulloq 1. maj 2024 nallertinnagu. Ilisimasortaaneermut piukkunnassusermik misilitsinnerit piffissami 1. januar 2023-mit 1. juli 2023-mut naammassineqarsimasut, nalunaarummilu piumasaaqatiniik naammassinissimasut, tassunga taarsiullugit atorneqarsinnaapput.

Bilaq 1 nutsereer neqarsimavoq

Pikkorissartitsumut piumasaaatit

Ilinniaqarsimanermut piumasaqaat

Ilisimasortanut pikkorissaanerit Bridge Ressource Management aamma Emergency Training

Pikkorissarnerup siunertaa:

Ilisimasortaanerup aallartinnginnerani aamma ilisimasortaanerup ingerlanneqarnerani, iisimasortap umiarsuullu naalagaata akornanni paasisutisseeqatigiittarnissaannik ilisimasortaq sungiusassallugu, matumani:

- Pilot Card.
- Umiartornerup pilersaarusiornera, matumani navianartorsiornermi periaasissat.
- Pituttuineq aamma kalittaait assigiiingitsut atorsinnaaneri.
- Sarfaq, ulittarneq tinittarneerlu aamma angallannermi pissutsit.
- Umiarsuarmik immikkut ittumik aqutsisinnaanernut piginnaasat, inuttat pisinnaasaamikkut killingi, teknikkikkut ajoqutit amigaatillu.
- Iluani avataanullu attaveqatigiinneq oqaatsit naleqquttut atorlugit.
- Umiarsuup naalagaanik aamma umiarsuup qaavani pigaartunik attaveqateqarneq.
- Ilisimasortaalluni suliaqarnerup nalaani imaluunniit navianartorsiornermi umiarsuup qaavani sulisut agguataarneqarnerat.

Ilisimasortaq uku pillugit ilisimasaqalertinnissaa aamma paasisimasaqalertinnissaa:

- Eqqarsartaatsikkut nukittuffiit aamma piginnaasat killingi.
- Oqaatsitigut kulturikkullu akimmiffiit.

Pikkorissarnermi sammisat tulluuttut sammineqarput:

- Ilisimasortaasuusaarnermi simulatori atorlugu sungiusarneq (full mission simulator), matumani pilersaarusiorneq, sivikitsumik ilisimatitsineq, attaveqatigiinneq aamma suleqatigiinneq.
- Simulatori atorlugu navianartorsiornermi ajornartoornermilu aqutsinissamut sungiusaatit atorlugit sungiusarneq, matumani ilimaginngisamik pisoqartillugu naleqqussarsinnaanermut piginnaasaq ilanngullugu.
- Inuttat ilisimasortallu akornanni attaveqatigiinneq attaveqarnerlu.
- Timikkut/tarnikkut pisinnaasanut killit nukittuffiillu.

Ingerlanneqarnera:

Pikkorissarneq taamaallaat ilisimasortanut ilisimasortannorgnianut ingerlanneqartarpoq aamma minnerpaamik ukiut tallimakkaarlugit ingerlateqqinneqartassalluni tak. § 8, imm. 3. Misilitsinneq naammassippat pikkorissarnermut peqataasoq teoriimik suliatigullu pikkorissarneq naammaginartumik angusiffigisimagaa pillugu uppernarsaammik atulersitsisoqassaaq.

Innersuussinerit:

IMO Resolution A. 960(23), immikkoortut 5.3, 5.4 aamma 5.5.

Umiarsuarnik aqutsineq ilisimasortanut

Pikkorissarnerup siunertaraa:

Umiartorfimmi sumiiffimmi naleqquttumi ilisimasortap tunngaviusunik/nalinginnaasunik umiarsuarmik aqutseriaatsinut teknikkunik sungiusarnissaa.

Pikkorissarnermi sammisat tulluuttut sammineqarput:

Teoriimik ilinniarneq, uku pillugit:

- Aquinnermi periarfissat aamma iliuusissat.
- Uninnissamut ungasissuseq.
- MOB (inuk-imarmut-nakkarpoq)-mik pisoqarfiusut.
- Assigiimmik sukkassusilimmik sangunissamut teknikkit.
- thrustere atornissaat.
- Umiarsuit azimuth atorlugu siumut ingerlaartinneqartarneri.
- Aquut, suussutsit assigiinngissutsit aamma sunniutaat.
- Sarpiit, suussutsit, sunniutit, kingorporsornerup sunniutai, umiarsuit marlunnik sarpillit.
- Umiarsualivimmi sarpiit aquutillu arlallit atorlugit aquunneq.
- Banking effect (umiarsuaq imarmi annikitsumi ingerlaffissalimmi ingerlanermi umiarsuup aquata ingerlaffiup sinaanut sangusarnera)
- Saneqqussineq.
- Umiarsuarnik allanik naapitsineq, matumani umiarsuup-umiarsuullu imminnut saneqqunneranni sunniutit.
- Silap pissusaani assigiinngitsuni umiartorneq, matumani anori, sarfaq aamma mallit sunniutaat.
- Kisarniartilluni aquunnerit.
- Sila ersernerlutsillugu aamma unnuakkut umiartortilluni sakkuutit atorlugit aquunneq.
- Squat effect (umiarsuup ikkattumi ingerlanerani immap naqqanut qaninnerulertarnera)
- Under Keel Clearance (umiarsuup timitaata allersaata immallu naqqata ungasissusaat)
- Pivot punkt (umiarsuup kaajallattarnerani qitiusoq)
- Hydrodynamik (umiarsuup immallu sunniivigeqatigiittarnerat)
- Umiarsuit angisuut aquunnerat, assersuutigalugu umiarsuit takornariartaatit.
- Kalittaatit atorneqartarnerat, matumani qaniuilluni kalinneq.
- POD aamma Joystick/DP systemer (joystick atorlugu aquunneq)

Qulaani teoriinik tapersiisumik umiartornermik sungiusarnerit, matumani:

- Umiarsuit assigiinngitsut atortullu atorlugit umiarsuarnik umiarsualivimmi aquunneq.
- Silap pissusaani assigiinngitsuni (anori, sarfaq aamma mallit) umiartorneq aqqusaarnerlu.
- Umiartorneq hydrodynamiske effekter-init (umiarsuup immallu sunniivigeqatigiittarnerat) soorlu bank effect-init (umiarsuaq imarmi annikitsumi ingerlaffissalimmi ingerlanermi umiarsuup aquata ingerlaffiup sinaanut sangusarnera) sunnerneqarsimaluni.
- Kisanneq.
- Squat effect (umiarsuup ikkattumi ingerlanerani immap naqqanut qaninnerulertarnera) aamma umiarsuarnik allanik saneqqussineq.
- Umiarsuarnik aqutseriaatsit uku atuutsillugit fixed pitch aamma variable pitchpropeller.
- Kalittaatip atorneq.

Ingerlanneqarnera:

Qulaani pineqartut umiartornermik sungiusarnerit aamma umiarsuarnik aquunnermut teknikkit ilisimasortamut naleqquttumi sumiiffimmi ilisimasortaaffissami ingerlanneqassapput. Ilinniartitsineq full mission simulatori atorlugu ingerlanneqarsinnaavoq.

Pikkorissarneq taamaallaat ilisimasortanut ilisimasortannornianut ingerlanneqartarpoq aamma minnerpaamik ukiut tallimakkaarlugit ingerlateqqinneqartassalluni tak. § 8, imm. 3. Misilitsinneq naammassippat pikkorissarnermut peqataasoq teoriimik suliatigullu pikkorissarneq naammaginartumik angusiffigisimagaa pillugu uppernarsaammik atulersitsisoqassaaq.

Innersuussinerit:

IMO Resolution A. 960(23), afsnit 5.5.

Ilisimasortanut ilisimasortaaneq pillugu inatsisilerinermik pikkorissarneq

Pikkorissarnerup siunertaraa:

Ilisimasortat nunat tamalaat akornanni nunallu iluani inatsisunik, malittarisassanik aalajangersakkanillu naleqquttunik ilisimasaqartilernissaat.

Pikkorissarnermi sammisat tulliuuttut sammineqarput:

- Inatsisip oqartussallu suliarineqarsimanerat
- Peqqussut Kalaallit Nunaanni atuutilersinneqartumi ilisimasortat pillugit inatsisip ilaa, aamma nalunaarutit il.il. atasut.
- Ilisimasortap pisussaaffii.
- Ilisimasortaqaarnissamut pisussaaffik.
- Ilisimasortat allagartamik uppersaammik peqalerneq aamma ilisimasortaasinnaajunnaarsitaanermut uppersaasat.
- Ilisimasortap akisussaaffia – matumani akuersissuteqarneq.

Ingerlanneqarnera:

Pikkorissarneq taamaallaat ilisimasortanut aamma ilisimasortanngornianut ingerlanneqartarpoq aamma minnerpaamik ukiut tallimakkaarlugit ingerlateqqinneqartassalluni tak. § 8, imm. 3. Misilitsinneq naammassipat pikkorissarnermut peqataasup teoriimik suliatigullu pikkorissarneq naammaginartumik angusiffigisimagaa pillugu uppersaammik atulersitsisoqassaaq.

Innersuussinerit:

IMO Resolution A. 960(23), afsnit 5.5 og 6.3.

Ilisimasortanut inuttut isumannaallisaanermut pikkorissarneq

Pikkorissarnerup siunertaraa:

Ilisimasortanut inuttut isumannaallisaanermik, imaani nammineq annanniarnissamut, navianartorsiornermi aamma ikiueqqaarnermut periaatsinik ilinniartinneqarneq matumani uummarsaaneq kiisalu timip kissassusaa 35 c ataassimappagu ajorneruleqqunagu annaassiniarneq. Aammattaaq ilisimasortat inunnik nuussinerit atattillugu ulorianaatinik aamma qanoq iliornissamut piareersaatinik malittarisassanik ilisimasaqassappat kiisalu inuk-imarmut-nakkarsimappat pisunut annaassiniarnermilu naleqquttumik iliuseqarsinnaanermut ilisimasaqartariaqarlutik.

Pikkorissarnermi sammisat tulliuuttut sammineqarput:

Ikiueqqaarneq:

- Radio Medicalimut attaveqarneq.
- Ikiueqqaarnermi immikkoortut pingaarnerit 4-t.
- Inuunermik annaassiniarluni ikiueqqaarneq, matumani uummammik aallartisaammik atuineq.
- Uummammi imaluunniit taqqani nappaatit.
- Uummammi taqqamik milittoorneq/uummatip noqarnera.
- Ipineq aamma timip kissassusaa 35 c ataassimappagu
- Kiggigussaalluni nakkarnermillu ajoqusernerit.
- Aanaarnermik unitsitsiniaaneq.
- Ajoqusersimasumik attaveqateqarneq.

Immami isumannaallisaaneq:

- Nammineq annanniarnermut atortussat, matumani nalunaarasuartaateeraq navianartorsiornermi atornerqartartoq.
- Inunnik nuussinerit atattillugu ulorianaatinik aamma qanoq iliornissamut piareersaatinut malittarisassanik ilisimasaqarneq
- Ilisimasortaqaq imarmut nakkarpata qanoq iliornissamut piareersaatinut malittarisassanik ilisimasaqarneq, matumani angallatip annaassiniarnissamut periarfissai akornutaalu.
- Immamik sungiussiniarneq/atallaanik sunngiussiniarneq, nammineq inuttut atortut atorlugit.

- Immamit aniguiniarluni periaatsit.
- Helikopterimi amoortaat.
- Kinngunermi sungiusarneq.
- Annanniutip periarfissai aamma akornutaalu
- Umiarsuarnit anginerusunit annaassiniarnermut periutsit, matumani annaassiniarnermut atortoq aqqutigalugu sisoortarfik “evakueringsstrømpe”.
- Annaassiniarnermut sungiusarnerup eqikkarnera.

Ingerlanneqarnera:

Ilisimasortap nammineq atortumini periarfissanik akornutinillu ilisimasaqalernissaa qulakkeerniarlugu, suliatigut pikkorissarneq ilisimasortap nammineq atortut atortagaasa assingi atorlugit ingerlanneqassaaq.

Pikkorissarneq naammassineqartarpoq, peqataasoq suliatigut sungiusarneqarnermini ukununga ilisimasaqarneq takutissimappagu:

- Ilisimasortamut ajoqusernaveeqqussummi angalaneq.
- Angallatini ammasuni kinngusoqartillugu pissusilersorneq.
- Immami ataasiakkaanut ataatsimoortunullu annanniarnermut teknikkit.
- Annanniummut ikineq, annanniummiinneq aamma sanguneq, annanniutip angissusaa ilisimasortaqtitsiviup atortagaa atorneqassaaq.
- Inummik imarmit annaassiniarnermut atatillugu pissusilersorneq, tassani annanneqartup annaassiniartullu atortagai umiatsiat, ilisimasortaqtitsiviup atortagaannut assingusut atorneqassallutik. Annaassiniarnermi sungiusarneq atortorissaarutit atorneqakkajuttut atorlugit ingerlanneqassaaq, assersuutigalugu cradle & kejs atorneqassallutik.
- Ataasiakkaat ataatsimooqatigiillu annaassiniarnermik sungiusarnermi pissusilersornerat eqikkaanermut atatillugu. Annaassiniarnermik sungiusarnerup umiarsuarnit imarmut, imarmit annanniummut aamma annanniummit helikopterimut annaassiniarnermut atatillugu suliatigut suliasat tamakkerlugit eqikkaaffigissavai.
- Teoriimik ilisimalikkat allattariarsornikkut misilitsitsissutigineqassapput. Akissutit minnerpaamik 80 %-ii eqqortuussapput.

Pikkorissarneq taamaallaat ilisimasortanut aamma ilisimasortanngornianut ingerlanneqartarpoq aamma minnerpaamik ukiut tallimakkaarlugit ingerlateqqinneqartassalluni tak. § 8, imm. 3. Misilitsinneq naammassippat pikkorissarnermut peqataasoq teoriimik suliatigullu pikkorissarneq naammaginartumik angusiffigisimagaa pillugu uppernarsaammik atulersitsisoqassaaq.

Pikkorissarnermut peqataasoq misilitsitsinnernik taaneqartunik angusinningsuussagaluarpat, taava pikkorissartitsisup aamma pikkorissarnermut peqataasup ataatsimoorlutik qanoq ingerlaqqittoqassanersoq pilersaarusiussavaat, qaamatit 6-it iluanni naammaginartumik pikkorissarnermik naammassinninnissaaq siunertaralugu.

Innersuussinerit:

IMO Resolution A. 960(23), afsnit 5.5.

Kalaallit Nunaanni sikoqarneq aamma sila pillugit pikkorissarneq

Pikkorissarnerup siunertaraa: Ilisimasortat Kalaallit Nunaanni sikoqarneq aamma sila pillugit ilinniartinneqassapput taamaallutik naammattumik qaffasissusilimmik Kalaallit Nunaata imartaani sikoqarneq aamma silami immikkut ittumik pissutsit atuuttut pillugit ilisimasaqalernissaat qulakkeerniarlugu.

Pikkorissarnermi sammisat tulluuttut sammineqarput:

Kalaallit Nunaanni sikoqarnermi aamma silami pissutsit uku tulliuuttut qitiutillugit:

- Umiartornermik pilersaarusiornermut atatillugu sikoqarneq pillugu paasissutissat
- Imarsiornermut tunngasumik Issittut imartaanni silap pissusia, silasiorneq, imarpiillu pillugit ilisimatusarnerit
- Kalaallit Nunaanni umiartornermi sikoqarneq aamma sila pillugit paasissutissanut teknologi.
- Satellitini aamma sikoqarneq pillugu paasissutissani akornutit
- Sikoqarneq pillugu paasissutissanik pissarsiniarnermut suliatigut naleqquttumik suliaqarneq
- Satellitinit paasissutissanik misissuineq, sumiiffinni assigiinngitsuni sikoqarnerup qanoq ittuuneranik takutitsisunik.

Ingerlanneqarnera:

Ilinniartitsinerup Kalaallit Nunaata imartaani immikkut ittumik sikoqarneq silalu pillugit pissutsit atuuttut naammattumik qaffasissuseqartumik ilisimasaqalersitsineq qulakkeerniarlugu, piumasarineqarpoq:

- Ilinniartitsineq ima aqqissuunneqassaaq, qulaani taaneqartut sammisat sungiusarnerillu pillugit teorii atuartitsissutigineqassaaq kiisalu paasissutissanik pissarsiarineqarsimasunik sulinermini atorsinnaasaanik ilisimasortaq sungiusarneqassalluni.
- Ilinniartitsineq iluaqutigineqartumik ilisimasortaqartitsiviup Kalaallit Nunaanni ilisimasortatut sulinermi paasissutissat atortagai aallaavigalugit piareersarneqarsinnaavoq.

Pikkorissarnerup naggataani pikkorissartooq teoriimik aamma suliatigut pikkorissarnermi naammaginartumik angusisimanera pillugu allagartmik uppernarsaammik atulersitsisoqassaaq.

Kalaallit Nunaanni immat assingisa qanoq issusaat pillugit ilisimasortanut pikkorissaaneq

Pikkorissarnerup siunertaraa:

Ilisimasortat Kalaallit Nunaanni immat assingisa qanoq issusaat pillugit ilinniartinneqarnissaat, taamaalilluni Kalaallit Nunaanni immat assinganik atuilluni isumannaatsumik umiarsuarmik ingerlatsinissaq pillugu naammattumik ilisimasaqalernissaq qulakkeerniarlugu.

Pikkorissarnermi sammisat tulliuuttut sammineqarput:

Kalaallit Nunaanni immat assingisa qanoq issusaat tulliuuttut qitiutillugit:

- Kalaallit Nunaata imartaani immanik itissusersuineq aamma immap assilaliorneq
- Kalaallit Nunaata imartaani immap assiliorneranut teknologi atorneqartartoq
- Itissutsit pillugit paasissutissani pitsaassuseq eqqorluanaanerlu
- CATZOC (immap itissusiinik uuttortaaneq)
- ENC umiartornermi elektroniskimik immap assingisa atorneqarsinnaanerit, matumani paasissutissani killiligaanerit, ENC atorlugu tunngaviusumik imalimmik atuilluni umiarsuarmik ingerlatsinerit
- Geometrii eqqorluarniaraanni tassunga killiligaanerit
- Immat assingini paasissutissat atorlugit umiarsuarmik sumiissusersiorneq, matumani ulloq, nunap qanoq issusianik isikkuanillu nalunaarsuineq, sineriak aamma immap itissusai
- Kalaallit Nunartaata imartaani GNSS, matumani GPS-ikkut sumiissusersiornermi eqqorluuasinnaaneq immat assingisa eqqorluasarnerannut sanilliullugit
- Pappialanik immat assingi elektroniskimik immap assinginut sanilliullugit (ass. itissutsit pillugit paasissutissani assigiinngissutsit)

Ingerlanneqarnera:

Ilinniartitsinerup naammattumik Kalaallit Nunaannut immat assingisa qanoq issusaat pillugit naammaginartumik qaffasissusilimmik ilisimasaqartitsilernissaq qulakkeerniarlugu piumasqaataavoq:

- Kalaallit Nunaanni immanik takutitsiviusumik immat ilaasa assingisa qanoq issusaat pillugit ilinniartitsoqassaaq, matumani sumiiffimmi ilisimasortaaffigisassami 5-imi matumani immat assingi tamaasa.
- Ilinniartitsineq ima ingerlanneqassaaq, qulaani taaneqartut sammisat pillugit teorii ilinniartitsissutigineqarlunilu suliasartanik ilisimasortannorniaq paasisutissanik pineqarsimasunik atuisinnaanissaanik sungiusarneqassaaq.
- Ilinniartitsineq iluaqutissartalimmik ilisimasortaqaqtitsiviup Kalaallit Nunaanni ilisimasortatut suliaqatitsigaangami paasisutissat atortagai aallaavigalugit piareersarneqarsinnaavoq.

Pikkorissarnerup naggataani allakkatigut uppersaammik atugasiisoqassaaq, taanna pikkorissarnermut peqataasimasup teoriimik aamma suliasartatigut pikkorissarnermik naammagartumik angusisimasooq pillugu uppersaataavoq.

Kalaallit Nunaanni ilisimasortanik simulatorimik pikkorissaaneq

Pikkorissarnerup siunertaraa:

Simulatorimik sungiusarnikkut Kalaallit Nunaanni sumiiffinni immikkut ittuni umiartornermik qinnuteqartumik misilittagaqaqtitsilerneq, taamaalilluni sumiiffimmi ilisimasortaaffissatut nunap ilaani qinnutigineqarsimasooq pillugu immikkut ittumik qaffasissuilimmik paasisimasaaqalernissaq aamma misilittagaqaqalernissaq pillugu akuersarneqarsinnaasumik qulakkeerinnissaq anguniarlugu.

Pikkorissarnermi sammisat tulliuttut sammineqarput:

- Simulatori atorlugu sumiiffinni qinnutigineqarsimasuni sungiusarneq, matumani radari atorlugu issittumi pissutsini sungiusarneq.

Ingerlanneqarnera:

Sumiiffimmi ilisimasortaaffissatut qinnutigisami sungiusaatit naammattumik qaffasissuseqartumik paasisimasaaqalernissaat aamma misilittagaqaqfigilernissaat qulakkeerneqassappat, taava piimasaqaataavoq:

- Sungiusarnerit full mission brosimulatori atorlugu aqqissuunneqassapput.
- Sungiusarnerit Kalaallit Nunaanni immikkut ittuni sumiiffinni, ilisimasortatut allagartartaarfigisassatut uppersaammik qinnuteqarfusimasumi ilisimasortaasuusaarnermik simulatori atorlugu aqqissuunneqassapput.
- Sungiusarnerit sarfat, mallit anorillu assigiinngitsut simulatorimi atuutsittuusaartillugit ingerlanneqassapput.
- Sungiusarnerit assigiinngitsunik qaamaneqartillugit erseqqarissuseqartillugillu, matumani putsertoqartillugu aamma iseriattoqartillugu, ulluunerani qaamaneq, taartumi kiisalu seqerngup qullariartornerani imaluunniit tarrikiartornerani ingerlanneqassapput.
- Ilulissat, iluliamerngit aamma puttaat simulatorimi isikkumikkut, ingerlaarnermik aamma radarimut qinngornermik utertitsineri uppersaassuseqartumik piviusuusaartinneqassapput.
- Sikunut seqersittaat atorneqarsinnaavoq.
- Sikut, ilulissat iluliamerngillu sumiinnerannik paasisaqarniarnermi radarip atornissaanik inissinnissaanillu sungiusartoqassaaq.
- Naleqquppat radarit marluk atorlugit umiarsuaq aqunneqassaaq
- Sungiusarnerit sumiiffimmi ilumoortumik ilisimasortatut ingerlatsineq assigalugu katillugit sivilissuseqassapput.

Pikkorissaasooq minnerpaamik ukuninnga pikkorissarnermik ingerlatsinnaasutut akuersissuteqassaaq:

- Umiarsuarni suliaqartunut pikkorissaatitsineq, uunga ilaasunut Polar Code (Umiarsuarni nunarsuup kaaviffiisa sikuiuitsortaanniittunut tunngaviusumik sungiusarneq aamma ingerlataqarnermik aqutsineq - Grundlæggende træning for skibe i polare farvande og Ledelse af operationer for skibe i polare farvande)

- Full Mission brosimulorkursus (STCW Reg. II/1 og II/2)

Pikkorissarnerup naggataani pikkorissartoq teoriimik aamma suliatigut pikkorissarnermi naammaginartumik angusisimanagera pillugu allagartmik uppersaammik atulersitsisoqassaaq.

Ilisimasortatut allagartamik uppersaammik atulersitsineq aamma atatitsineq

Aallaqqaasiut

Ilannugsaq una sumiiffinni ilisimasortaaffissani assigiinngitsunik suussusilinni umiartornerup akulikissussaannut piumasaqaatinik aalajangersaavoq.

Sumiiffinni ilisimasortaaffissani ilisimasortaasinnaanermut allagartaq uppersaamat atulersinneqassappat imaluunniit taanna pillugu atatitsineq pigiinnarneqassappat taava piginnittup umiartornerit akulikissussissaannut piumasaqaatit naammassissavai. Umiartornerit akulikissussaat pillugu allagaatit uppersaamatit elektroniskimik Søfartsstyrelsenip nalunaaruteqartarfiatigut nassiunneqassappat.

Umiartornerit akulikissussissaannut piumasaqaat sumiiffimmi ilisimasortaaffissami ilisimasortat qassit akuersissuteqarnersut, aamma sumiiffimmi ilisimasortaaffissat qassit ingerlanneqarnersut tunngavigalugit nalilersorneqartarpoq. Umiartornerit akulikissussissaannut piumasaqaat sumiiffimmi ilisimasortaaffissani ataasiakkaani tamani sapinngisaq tamakkerlugu suussusilerneqartarnissaa anguniagaavoq.

Umiartornerit akulikissussissaat ima nassuiarneqartarpoq sanilimik ilitsersorneqarluni ilinniartitsinerit/ilisimasortatut ingerlatsinerit ukiut tallimat ingerlanerisa iluanni amerlassusaat suussutsini ukunani:

Suussuseq GL/A – sumiiffimmi ilisimasortaaffissami minnerpaamik sanilimik ilitsersorneqarluni ilinniartitsinerit/ilisimasortatut ingerlatsinerit minnerpaamik 20-t, taakkunanga 10-t simulatorimik sungiusarluni pissarsiarineqarsinnaapput..

Suussuseq GL/B – sumiiffimmi ilisimasortaaffissami minnerpaamik sanilimik ilitsersorneqarluni ilinniartitsinerit/ilisimasortatut ingerlatsinerit minnerpaamik 10-t, taakkunanga 5-it simulatorimik sungiusarluni pissarsiarineqarsinnaapput.

Suussuseq GL/C - sumiiffimmi ilisimasortaaffissami minnerpaamik sanilimik ilitsersorneqarluni ilinniartitsinerit/ilisimasortatut ingerlatsinerit minnerpaamik 5-it, taakkunanga 2-t simulatorimik sungiusarluni pissarsiarineqarsinnaapput.


Suussuseq GL/D – sumiiffimmi ilisimasortaaffissami minnerpaamik sanilimik ilitsersorneqarluni ilinniartitsinerit/ilisimasortatut ingerlatsinerit minnerpaamik 2-t. Sumiiffimmi ilisimasortaaffissami ilisimasortaannermut allagartamik uppersaammik pissarsiniaraanni ilisimasortanngorniaq Kalaallit Nunaanni ukiut tallimat kingulliit iluanni minnerpaamik 40-nik ilisimasortaasimassaaq.

Suussuseq GL/E – sumiiffimmi ilisimasortaaffissami minnerpaamik sanilimik ilitsersorneqarluni ilinniartitsinerit/ilisimasortatut ingerlatsineq minnerpaamik 1. Sumiiffimmi ilisimasortaaffissami ilisimasortaannermut allagartamik uppersaammik pissarsiniaraanni ilisimasortanngorniaq Kalaallit Nunaanni ukiut tallimat kingulliit iluanni minnerpaamik 80-inik ilisimasortaasimassaaq, taakkunanga minnerpaamik 10-t umiartorfigineqarsinnaasup avannaata-tungaani ilisimasortaaffigineqarsimassallutik.

Suussuseq GL/F – sumiiffimmi ilisimasortaaffissami minnerpaamik sanilimik ilitsersorneqarluni ilinniartitsinerit/ilisimasortatut ingerlatsineq minnerpaamik 1.

Sumiiffimmi ilisimasortaaffissat ataani nunap assingani takuneqarsinnaapput.

Sumiiffimmi ilisimasortaaffissat ataasiakkaat suussusilerneqarneri, matumani umiarsualiviit, Søfartsstyrelsenip nittartagaani allassimapput.



Sumiiffik ilisimasortaaffissaq 1:
 Kitaani sineriak 72°00'N –
 Kitaani sineriak 81°12'N

Sumiiffik ilisimasortaaffissaq 2:
 Kitaani sineriak 81°12'N –
 Tunumi sineriak 73°31'N

Sumiiffik ilisimasortaaffissaq 3:
 Tunumi sineriak 73°31'N –
 Østkyst 66°00'N

Sumiiffik ilisimasortaaffissaq 4:
 Tunumi sineriak 66°00'N –
 Tunumi sineriak 61°01'N

Sumiiffik ilisimasortaaffissaq 5:
 Tunumi sineriak 61°01'N –
 sineriak 72°00'N – Kitaani
 64°40'N

Sumiiffik ilisimasortaaffissaq 6:
 Kitaani sineriak 72°00'N –
 Kitaani sineriak 64°40'N –
 Vestkyst 68°31'N

Sumiiffik ilisimasortaaffissaq 7:
 Kitaani sineriak 68°31'N –
 Kitaani sineriak 72°00'N

Umiarsualiviit sumiiffimmi
 ilisimasortaaffissaaput
 immikkut ittut.

Ilisimasortaanermut piukkunnassusermik misilitsinneq

Ilisimasortatut allagartap uppersartaatip pissarsiarinissaanut misiltsinnermut piunasaqaatit:

Ilisimasortaanermut piukkunnassusermik misilitsinneq teoriimik suliatigullu misiltsinnermik ilaqarpoq, tassani ilisimasortatut allagartartaarfigisassatut uppersartaammik imminut atulersitsisoqassappat sumiiffimmi aalajangersimasumi ilisimasortaaffissami ilisimasortaasinnaanermut pisariaqartinneqartumik ilisimasaqarnini ilisimasortanngorniap takutissavaa, IMO Resolution A. 960(23), immikkoortoq 7 malillugu.

Angusinissamut piunasaqaatit:

Misiltsinnernut ataasiakkaanut angusinissamut piunasaqaatit alloriarnerni tulliuuttuni assigiinngitsunik immikkoortiterneqarsimapput:

1. alloriarneq – Ilisimasat

Qinnuteqartoq pingaarnerusumik teoriimik ilisimasaqassaaq aamma nalinginnaasumik tunngaviit teoriillu oqaluttuareqqissinnaallugit.

2. alloriarneq – Paasisimasaqarneq

Qinnuteqartoq nammineq oqaatsini atorlugit sammisaq oqaluttuareqqissinnaavaa assersuusiorlunilu. Qinnuteqartup tigulaakkanik pingaarnernik eqikkaasinnaavoq aamma akuliunnerit kingunerisallu paasisinnaallugit.

Tassani qaffasissuseqarnermi qinnuteqartup allat pillugit ilisimasanut naleqqiussinnaanissaa imaluunniit paasinnilluarsinnaanera naatsorsuutigineqanngilaq.

3. trin – Atuisinnaaneq

Qinnuteqartup pissutsini nutaani pivisuni nalinginnaasumik isummat, teoriit, tunngaviit, suleriaatsit aamma periaatsit atorsinnaassavai.

Ilisimasortaanermut piukkunnassusermik misiltsinnerup suliatigut immikkoortua ilisimasortatut sulineri ingerlanneqassaaq, tassani qinnuteqartup teoriimik ilisimasaqarnini sumiiffimmi ilisimasortaaffissami ataatsimi qinnuteqaatigineqarsimasumi umiartornermik pilersaarutigineqarsimasumik piviusumik suliatigut akisussaassuseqartumik ingerlatsinermigut takutissavaa. Ilisimasortanngorniap takutissavaa, nammineq teoriimik ilisimasaminik teoriimik misiltsinnermi soraarummeerutigineqartussanik atuisinnaanini.

Ilisimasortaq suliatigut misiltsittussaq ilaatigut tulliuuttut takutissinnaassavai:

- Ilisimasortatut sulinissamik piareersaaneq, matumani umiartornissamik pileraarusiorneq
- Ilisimasortamik ikisinermi qanoq malittarisassat
- Umiarsuarmi ilisimasortamut isumannaatsuunissaq pillugu malittarisassat
- Umiarsuup qaavani suleqatigiinnik ilisimatitsineq
 - Pissutsit Kalaallit Nunaanni immikkut ittut
 - Kalaallit Nunaanni nalunaarutiginnittarnernut aqqiussuussinerit
 - Ilisimasortaanermi anori, sila aamma siku
 - Immap assingata qanoq issusaa, matumani ikkarluit annertuut aamma/imaluunniit akornutit
 - Sikunut seqersittaatip atornera aamma sikunik suussusiliineq
 - Polar Water Operational Manual (PWOM)
- Umiarsuup qaavani suleqatigiinnut akuuneq, tassani umiartornerup isumannaatsuunissaanik qaffassaaqataaneq, matumani
 - Erseqqissumik iluameersumillu attaveqaqateqarsinnaaneq
 - Umiarsuup ingerlaarnerani siumut sillimareernej aamma umiarsuup qaavani suleqatigiinnik piunasaqaataasumik siunnersuisinnaaneq
 - Aqunermi atortut pigineqartut naleqquttumik atorlugit, matumani radarip iluameersumik atornissaanik takutitsineq aamma radarit marluk atorlugit umiarsuarmik aqutsisinnaaneq
- Ilisimasortatut suliamik eqqortumik ingerlatitseqqiineq/naammassinnineq

Ilisimasortaanermut piukkunnassusermik misilitsinnerup teoriimik immikkoortua ingerlanneqassaaq qinnuteqartup teoriimik ilisimasaqarnini sumiiffimmi ilisimasortaaffissami ataatsimi qinnuteqaatigineqarsimasumi takutitsinerani, tak. ataani skiima.

Misilitsinnermut piumasagaat	Angusinissamut piumasagaat	Misilitseriaaseq
1. Sumiiffimmi ilisimasortaaffissap killilernera	Qinnuteqartut sumiiffimmi ilisimasortaaffissap qinnutigineqarsimasup killilernissa pillugu ilisimasani takutitsissapput, aamma imminut tatigaluni immap assingani killit takutissinnaassallugit aamma ilisimasortanik ikisisarfiit sumiinnerinik paasisimasaqarnerminik takutitsissalluni.	Qinnuteqartup imminut tatigaluni takutissinnaasariaqarpaa sumiiffiup ilisimasortaaffissap killingi sumiinersut aamma ilisimasortanik ikisisarfiit sumiinnerisut nassuiarsinnaasariaqarlugu.
2. Nunat tamalaat akornanni immami aqutitut malittarisassat (COLREG),	Qinnuteqartup sumiiffimmi pissutsit pillugit ilisimasani atuisinnaaneq takutissavaa, apornissamut navianartorsiornermut pingaaruteqartunik. Matumani: - Sumiiffimmi umiarsuarnik angallanneq, matumani ikaartaatit angallannerat, angallatit umiartortunik nakkutilliisut, umiarsuit aalisariutit aamma allat, umiarsuit aquneranut siunniuteqarsinnaasut.. - Motorillit immami aqutaat. - Imartani amitsuni ingerlaarfiit - Angalanissamut aqutissat innersuussat	Qinnuteqartup, immap assinga ikiorsiuullugu, angallannermi ileqqut nalinginnaasut sumiiffimmi ilisimasortaaffissagisamiinnissaatut naatsorsuutigineqarsinnaasut aamma taakku umiarsuup isumannaatsumik aquneqarnissaanut sunniutai nassuiaateqarfigisinnaassavai.
2.a. Umiartorneq pillugu nalunaarutit malittarisassallu naleqquttut	Qinnuteqartup malittarisassat Kalaallit Nunaata imartaani umiartornermi atuuttut malissinnaassavai.	Qinnuteqartup Kalaallit Nunaata imartaani umiartornermut malittarisassat nassuiarsinnaassavai, matumani sikunut seqersittaatit, umiartorfissat immikkoortitersimani isumannaallisaanermut piumasagaatit kiisalu umiarsuarnut 250-it sinnerlugit ilaasulinnut immikkut ittumik piumasagaatit nassuiarsinnaassallugittaaq.
2.b. Kalaallit Nunaanni ilisimasortat pillugit inatsisip ilaa pillugu peqqussut atuutilersinneqartoq, nalunaarutit tassunga ilaasut ilanngullugit.	Qinnuteqartup ilisimasortat akissussaaffii pisussaaffiilu pillugit ilisimasani atorsinnaasariaqarpai. Qinnuteqartup qaqugu sumiiffimmi ilisimasortaaffissami umiarsuit ilisimasortaqaqarnissamut pisussaaffeqartitaanersut nassuiarsinnaasariaqarpaa.	Qinnuteqartoq oqaluttariarsornikkut malittarisassat naleqquttut pillugit misilitsinneqarnermini paasisimasaqarfigilluarsimallugit takutitsissaaq.

<p>2.c. Imarsiormi isumannaallisaaneq pillugu inatsit</p>	<p>Qinnuteqartoq inatsisip ilaanut naleqquttunut pasisimasaqassaaq.</p>	<p>Qinnuteqartoq oqaluttariarsornikkut misilitsinnerup ingerlanerani inatsit pillugu ilisimasaqarnini takutissinnaassavaa.</p>
<p>3. Immami aqutissat nalunaaqutsersorneqarneri</p>	<p>Qinnuteqartup sumiiffinni naleqquttuni immami aqutissat nalunaaqutsersorneqarsimaneri pillugit ilisimasani atorsinnaassavai.</p> <p>Qinnuteqartoq nalunaaqutsersorneqarsimasut eqqaanni tassanngaannartumik pisoqartillugu pissutsit pillugit paasissutissat Kalaallit Nunaanni imartani paasissutissiissutigisarnissaat paasisimasaqarfigalugit takutitsissaaq.</p>	<p>Qinnuteqartoq sumiiffimmi ilisimasortaaffissami ilummukaartilluni sammiviit allanngartarnerannik ilisimasaqarnerminik takutitsissaaq. Qinnuteqartoq umiarsuarmik aqutsilluni tassanngaannartumik mianersoqqussutit, tusarliussat aamma allat umiartornermi paasissutissat tiguneqartarnerinik suliatigut ilisimasaqarnerminik aamma taakku pillugit paasissutissat sumi nassaarineqarsinnaanersut pillugu takutitsissalluni.</p>
<p>4. Naaralaartitsiviit immikkut pissusii, naaralaartitsiviit vinkilii, pujortumi kalerrisaarutit, racons, radio beacons aamma elektroniskimik ikiuutissat, matumani piviusungatitamik immami aqutissat nalunaaqutsersorneqarneri /AIS</p>	<p>Qinnuteqartup naaralaartitsiviit pingaarutillit taakkulu immikkut pissusiinik kiisalu sumiiffimmi ilisimasortaaffissami Racon aamma piviusungasumik immami aqutissat nalunaaqutsersorsimaneri pillugit ilisimasaminik atuisinnaassaaq.</p>	<p>Qinnuteqartup sumiiffimmi naaralaartitsiviit pingarnerit allallu suussusilersinnaassavai, aamma naleqqutsillugu, immikkut pissusiinik oqaluttuarsinnaassalluni.</p>
<p>5. Puttaqutit pituffiisa atii, sumiissusaat aamma immikkut pissusii, beacons, aalajangersimasumik nalunaaqutsikkat aamma nalunaaqutserneqarsimasut allat atii</p>	<p>Qinnuteqartoq umiarsuarmik aqutsinermi puttaqutit pingaarnersat, beaconsit, aalajangersimasumik nalunaaqutsikkat aamma sumiiffimmi ilisimasortaaffissami nalunaaqutsikkat allat pillugit ilisimasaminik atuisinnaassaaq.</p>	<p>Qinnuteqartup puttaqutit pingaarnersat allallu sumiiffimmiittut suussusilersinnaassavai, aamma naleqquppat, taakku immikkut pissusai oqaluttuarisinnaassallugit.</p>
<p>6. Immap naqqani qooqqinerit, immat ikkattut, nuuit, aamma ilisarnaatit allat atii immikkullu pissusii</p>	<p>Qinnuteqartup immap naqqani qooqqinerit, immat ikkattut, nuuit aamma ilisarnaatit allat pillugit iisimasaminik atuisinnaassaaq. Pingaarnerusumik immikkut ittumik pingaartinneqassapput pissutsit isumannaatsumik umiarsuarmik</p>	<p>Qinnuteqartup immap naqqani qooqqinerit, immat ikkattut, nuuit aamma ilisarnaatit allat naleqquttut suussusilersinnaassavai aamma nassuiaaffigalugit. Pingaarnerusumik immikkut ittumik pingaartinneqassapput</p>

	aqutsinermut pingaarutillit, ass. radari atorlugu umiarsuup aqunnissaanut nunami sumiiffiit, matumani radarit marluk atorlugit umiarsuarmik aqutsineq.	pissutsit isumannaatsumik umiarsuarmik aqutsinermut pingaarutillit, ass. radari atorlugu umiarsuup aqunnissaanut nunami sumiiffiit, matumani radarit marluk atorlugit umiarsuarmik aqutsineq.
7. Ikaartarfiit assigisaasalu akornutitut killiliineri, matumani umiarsuup immap killinganit qummut portussusaa (air draught)	Sumiiffimmut ilisimasortaaffissatut qinnutigineqartumi sanaartukkat naleqquttut umiarsuarmik isumannaatsumik aqutsinermi sianigisassat pillugit ilisimasaminik atuisinnaassaaq. Sanaartukkat atituumik paasineqassapput. Ilaatigut innallagiamut sakkortuumut ledningit aamma mittarfiit umiarsuup immap killinganit qummut portussusaanut (air draught) sunniutaat ilaassapput.	Qinnuteqartup immap assingi atorlugit akornuserneqarluni killilerneqarsimanerit sumiinnersut takutissinnaassavai, kiisalu umiarsuaq qaqugukkut isumannaatsumik ingerlasinnaanersoq oqaatigalugu. Qinnuteqartup immap killinganit qummut portussusaa (air draught) pillugu nalunaaruteqarneq qanoq ingerlanneqarsinnaanersoq nassuiaatigisinnaassavaa.
8. Immap itissusai, ulittarneq tinittarnerlu aamma pissutsit assingusut	Qinnuteqartup sumiiffimmi immap itissusaannik aamma ulittarnerup tinittarnerullu annertutigisarneranik paasisimasaqarnini takutissavaa. Qinnuteqartup sumiiffimmi sarfat pillugit pissutsinik paasisimasaqarnini takutissavaa.	Qinnuteqartup sumiiffimmi itissutsit nassuiarsinnaassavai aamma nassuiarlugu sumiiffiit sorliit aalajangersimasumik itissusilimmiittut "ornineqassanngitsut". Qinnuteqartup sumiiffimmi sarfamik missiliuineq aamma ulittarneq tinittarnerlu oqaluttuarisinnaassavai.
9. Nalinginnaasumik ulittarneq tinittarnerlu, ulittarneq tinittarnerlu pillugit tabiili aamma pisoqarnerani-piffissamut paasissutissat kiisalu paasissutissanut systemit taakku pigineqarpata	Qinnuteqartup paasissutissanut systeminik naleqquttunik paasinissinnaanerinik takutississsaaq.	Qinnuteqartoq ulittarneq tinittarnerlu aamma immap qummut killinga pillugit aamma silasiornermut paasissutissat allat sumi nassaarineqarsinnaanersut nassuiarsinnaassavaa. Kiisalu atortussani naleqquttuni ujaasisinnaassalluni (matumani nittartakkani).
10. Aqqudit, sammiviit ungasissutsillu	Qinnuteqartup sumiiffimmi ilisimasortaaffissami umiartornermi aqqudit, sammiviit ungasissutsillu pillugit ilisimasaminik atuisinnaassaaq.	Aqqudit immap assingani tikkuartorneqassapput aamma sammiviit ungasissutsillu oqaatigineqassallutik. Qinnuteqartup aqqudmik qinersisimanini tunngavilersussavaa.

<p>11. Sumiiffiit kisarfiusartut, kisartarneq</p>	<p>Qinnuteqartup sumiiffiit kisarfiusartut toqqakkat aamma pissutsit assigiinngitsut atuutsillugit sumiiffiit kisarfiusartut atorneqartarneri pillugit paasinninnerminik takutitsissaaq. Kiisalu navianartorsiornermi sumiiffiit kisarfiusartussat pillugit paasisimasaqassaaq (places of refugee). Qinnuteqartup kisarfissatut tulluurtut toqqarneqarsimannngitsut suumiissusilersinnaassavai.</p>	<p>Qinnuteqartup immap assingani kisarfiusartut tikkuarsinnaassavai atorneqarnerallu oqaluttuarissallugu. Qinnuteqartup immap assingani toqqarneqarsimannngitsut kisartarfiit toqqassavai tunngavilersorlugillu kiisalu Kalaallit Nunaata imartaanni kisartarnermi periutsit pillugit nassuiaasinnaassalluni.</p>
<p>12. Ilisimasortaq atorlugu umiarsuarmik aqutsineq, kisarneq, talittarfimmut talittarfimmiit, kalinneqarluni kalinneqarnanilu aqunneq, aamma ajornartoorfiusuni</p>	<p>Qinnuteqartup sumiiffimmi umiarsuarmik ajornartorsiorfiusumik aqunneq pillugu ilisimasaminik atuisinnaassaaq – pingaartumik talittarfimmut talinnermi/talittarfimmit aallarnermi.</p>	<p>Qinnuteqartup assersuusiorluni umiarsuarmik tikinnermi, kisarnermi aamma ajornartorsiorfimmi aqunneq pillugu paasisimasaqarnini takutissavaa. Aamma naleqquppata kalittaatinik atuineq pillugu.</p>
<p>13. Umiarsuarmik aqunnermi attaveqaqatigiinneq aamma paasissutisseeriaatsinut atorneqarsinnaasunut periarfissat allat.</p>	<p>Qinnuteqartup sumiiffimmi attaveqaqatigiittarfiit naleqquttut pillugit ilisimasamik atuisinnaassaaq kiisalu umiarsuarmik aqunnermi paasissutissanik sumi pissarsiniarsinnaaneq ilisimassallugu.</p>	<p>Qinnuteqartup sumiiffimmi suliaqartunik naleqquttunik qanoq attaveqaqateqartoqarsinnaanersoq, ass. umiarsualivinnik, VTS-inik il.il. takutissinnaassavaa, kiisalu umiarsuarmik aqunnermi paasissutissanik qanoq pissarsiniartoqarsinnaanersoq.</p>
<p>14. Umiarsuarmik aqunnermi mianersoqqussutit aamma paasissutissat allat naleqquttut.</p>	<p>Qinnuteqartup sumiiffimmi umiarsuarnik aqunnermi mianersoqqussutit qanoq nassiunneqarsinnaanersut pillugu ilisimasaminik takutitsisinnaassaaq.</p>	<p>Qinnuteqartup sumiiffimmi umiarsuarnik aqunnermi mianersoqqussutit qanoq, aamma paasissutissiisarfiit sorliit atorlugit umiarsuarnik aqunnermut mianersoqqussutit tiguneqartarnerisut nassuiaatigisinnaassavaa..</p>
<p>15. Angallannermi avissaaqqanissamut systemit, VTS amma umiartornermi najoqqutassat</p>	<p>Qinnuteqartup sumiiffimmi angallannermi avissaaqqanissamut systemit aamma VTS-systeminik atuineq kiisalu umiartornermi malitassat taakkunungalu innersuusutit pillugit ilisimasaminik atuisinnaassaaq.</p>	<p>Qinnuteqartup VTS-it sumiiffiisa sumiiffimmi killinganik aamma nalunaartussaataitanermit pisussaaffimmik nassuiaasinnaassaaq. Matumani VTS-inik nalunaarutit imaannik aamma attaveqarnermi attaveqaqatigiinnermut atortut aamma nalunaarutit pillugit. Angallannermi avissaaqqanissamut systemit immap assingani</p>

		takutinneqassapput oqallisigineqarlutillu.
16. Umiarsuup qaavani atortut aamma umiarsuup aqunneranut atortut	Qinnuteqartup umiarsuup qaavani atortunik aamma umiarsuup aqunneranut atortunik ilisimasamink umiarsuarni assigiinngitsuni atuisinnaassaaq.	Qinnuteqartoq unammillernartunik eqqartuisinnaassaaq, ass umiarsuarni pisoqqani umiarsuup aqunneranut atortut aamma taakku pisinnaasaanni killit paasisinnaassallugit.
17. Radarinik allanillu elektroniskinik atortunik atuineq, taakku umiarsuarnik aqunnermi pisinnaasaani killingi aamma periarfissaat aamma apornerit pinngitsoortinnissaat.	Qinnuteqartup radari aamma apornerit pitsaaliornissaannut aamma umiarsuarmik aqunnermi atortussanik elektroniskinik allanik ilisimasaminik atuisinnaassaaq.	Qinnuteqartup soraarummeernermini naleqquttunik elektroniskinik atortunik atuisinnaanermut ilisimasaminik takutitsisinnaassaaq.
18. Umiarsuarsuit ilisimasortaqartutut naatsorsuutigineqartutut aqussinnaanerinut piginnaasat, aamma umiarsuup siuariartornerani aamma aqutsinermut systemiini aalajangersimasuni pisinnaasani killit.	Qinnuteqartup umiarsuit assigiinngitsut aqussinnaanerinut piginnaasat pillugit ilisimasaminik atuisinnaassaaq.	Qinnuteqartup umiarsuit assigiinngitsut sarpii il.il. apeqqutaatillugit aqunneqarsinnaaneri eqqartorsinnaasariaqarpai.
19. Pissutsit umiarsuup pisinnaasaanik sunniisut, soorlu ass. anori, sarfaq, ulittarneq tinittarneq, useqarsinnaanermut pissutsit, immap itisusaa, immap naqqa, nunap sinaa aamma umiarsuit sunniivigeqatigiittarnerat il.il.	Qinnuteqartup umiarsuup pisinnaasaanik sunniisinnaasut pissutsit paasisimasaqarfigalugit takutitsissaaq.	Qinnuteqartoq pissutsit assigiinngitsut atuutstillugit umiarsuarni assigiinngitsuni sunniutit nassuiaatigisinnaassavai.
19.a. Squat effekt (umiarsuup ikkattumi ingerlanerani immap naqqanut qaninnerulertarnera)	Qinnuteqartup squateffektimik - umiarsuup ikkattumi ingerlanerani immap naqqanut qaninnerulertarneranik (aamma banking effectip - umiarsuaq imarmi annikitsumi ingerlaffissalimmi ingerlanermi umiarsuup aquata ingerlaffiup sinaanut sangusarnera)	Qinnuteqartup oqaluttariarsornikkut squat effekti nassuiaassavaa kiisalu sumiiffiit tamattut pisoqarfiusinnaasut tikkuassallugit.

	sumiiffinni pissutsini naleqquttumik umiarsuup timitaata immap qaavata ataanut itissutsimut pisarnerani paasisimasaminik takutitsisinnaassaaq.	
19.b. Under Keel Clearance (umiarsuup timitaata allersaata immallu naqqata ungasissusaat)	Qinnuteqartup sumiiffinni aamma umiarsuup timitaata immap qaavata ataanut itissutsimut pisarnerani naleqquttumik UKC-qarneq (umiarsuup timitaata allersaata immallu naqqata ungasissusaat) pillugu paasisimasaqarnini takutissavaa.	Qinnuteqartup umiarsuarmut aalajangersimasumut naleqquttumik UKC-qarneq oqaluttuarissavaa aamma toqqaasimanini tunngavilersussallugu.
20. Kalittaait assiigiinngitsut atorneri pisinnaasaannilu killit	Qinnuteqartup kalittaait assiigiinngitsut pillugit ilisimasaminik atuilluni eqqortumik atornissaannik nassuiaasinnaasariaqassaaq.	Qinnuteqartup ass. tikinnermi/aallarnermi kalittaait assiigiinngitsut qinnuteqartup qanoq atorsinnaanerlugit innersuussissaaq.
21. Tuluttut piginnaasaqarneq, ilisimasortap erseqqissumik attaveqaqateqartarnissaanut qaffasissuseqartumik	Qinnuteqartup tuluttut ilisimasaqarnini suleqatinik tamanik erseqqissumik attaveqaqateqartarnernini atorsinnaassavaa – matumani inuttanut	Nalilerneqarpat naleqquttuusooq misilitsinnerup ilaa tuluttut ingerlanneqarsinnaavoq
22. IMO-p Imarsiornermut Nalinginnaasumik oqariartaasii	Qinnuteqartoq IMO-p Imarsiornermut nalinginnaasumik oqariartaasiinik paasinnaalluni takutitsisinnaassaaq.	Naleqquttoq nalilerneqarpat misilitsinnerup ilaa tuluttut ingerlanneqarsinnaavoq – ass. IMO-p Imarsiornermut nalinginnaasumik oqariartaasiinik atuilluni.
23. Immami ajunaartoqartillugu misissuineranut aamma – pisimasunut IMO-kodi	Qinnuteqartoq IMO-kodimik paasisimasaqarnermik takutitsissaaq.	Qinnuteqartup immami ajunaartoqartillugu arlaanillu pisoqartillugu paasisutissat aalajangiusimaneranut periutsit naleqquttut aamma nakkutilliinerit suuneri oqaatigissavai, takuuk kodi.
24. Bridge Team Management (Umiarsuup qaavani isumannaatsuunermut aamma kukkusoqarsimatillugu aqutsineq) matumani Master-pilotimut (umiarsuup inuttaatalu isumannaatsuunissaanut akisussaasumut) atassuteqarnermut, suleriutsimut kiisalu pilot card pillugit ilisimasaminik atuisinnaassaaq.	Qinnuteqartup BTM (Umiarsuup qaavani isumannaatsuunermut aamma kukkusoqarsimatillugu aqutsineq pillugu) aamma Master-pilotimut (umiarsuup inuttaatalu isumannaatsuunissaanut akisussaasumut) atassuteqarnermut, suleriutsimut kiisalu pilot card pillugit ilisimasaminik atuisinnaassaaq.	Qinnuteqartup suleqatigiinnerup pitsaasup isumannaatsullu qanoq ingerlatiinnarneqarsinnaanera aamma ilisimasat paasisutissallu pitsaanerpaamik qanoq avitseqatigiisutaasinnaanersut pillugit eqqartuisinnaassaaq.

<p>sulinermi periutsit kiisalu Pilot Card (umiarsuup massakkut qanoq innera pillugu paasisutissat soorlu usisinnaanera, siumut siuariartortarnera aqunneranullu atortut kiisalu atortut naleqquttut allat)</p>		
<p>25. Mingutsitsinermut pitsaaliuineq</p>	<p>Qinnuteqartup umiarsuarni assigiinnigitsuni mingutsitsinermut pitsaaliuinerminik naleqquttumik paasisimasaqarnerminik takutitsisinnaasariaqarpoq, kiisalu mingutsitsisoqarsimatillugu imaluunniit mingutsitsisoqarnissaanik navianartorsiortoqartillugu nalunaarutiginninnissamut periutsinik paasisimasaqarluni takutitsisinnaasariaqarluni.</p>	<p>Qinnuteqartup umiarsuit namminneq mingutsitsinissamut pitsaaliuisinnaanerat nassuiaatigisinnaassavaa, kiisalu mingutsitsisoqarsimatillugu/mingut tsitsisoqarnissaanik navianartorsiortoqartillugu pisortanut qanoq nalunaarutiginnittoqartarnera pillugu nassuiaasinnaasariaqarluni. (matumani ikkarlinnerit pillugit).</p>
<p>26. Navianartorsiornermi aamma upalungaarsimanermut pileraarutit</p>	<p>Qinnuteqartup navianartorsiornerni malittarisassat pillugit ilisimasaqarnerminik takutitsisinnaasariaqarpoq. Matumani kimut qanorlu nalunaaruteqartoqartassanersoq.</p>	<p>Qinnuteqartup navianartorsiornermi malittarisassat pillugit oqaloqatiginnissinaasariaqarpoq aamma tamanna qanoq nalunaarutigineqartarnera nassuiaatigisinnaassallugu.</p>
<p>27. Isumannaatsumik ikisinermut niusinermullu periuseq</p>	<p>Qinnuteqartup ikisinermut aamma niusinermut eqqortunik periutsinik ilisimasaqarnini atorsinnaasariaqarpaa.</p>	<p>Qinnuteqartup isumannaatsumik ikisineq niusinerlu pileraarusiorsinnaallugu takutitsisariaqarpoq.</p>
<p>28. Ilisimasat allat naleqquttut, pisariaqartinneqartutut isigineqartut, matumani:</p>		
<p>28.a. Nalunaarutiginnittus- saanermut pisussaaffik</p>	<p>Qinnuteqartup qagugu nalunaarutiginnittussaanermut pisussaaffeqartoqarnera aamma sumut nalunaarutiginnittoqartassanersoq ilisimasaminik atuisinnaassaaq.</p>	<p>Qinnuteqartoq soraarummeernerup ingerlanerani takutissinnaassavaa nalunaarutiginnittussaanermut pisussaaffimmik aamma qagugu nalunaarutiginnittoqartassanersoq paasisimasaqarluni.</p>

28.b. Immap assingata qanoq ittuunera	Qinnuteqartup Kalaallit Nunaata imartaanut immap assingini pissutsit immikkut ittumik atuuttut pillugit ilisimasaminik atuisinnaassaaq.	Qinnuteqartup soraarummeernerup ingerlanerani Kalaallit Nunaata imartaanut immap assingini pissutsit immikkut ittumik atuuttut pillugit paasisimasaqarluni takutitsisinnaassaaq.
28.c. Polarkoden (Nunarsuup kaaviffiisa sikuiuitsortaasa imarsiornermit navianaatinut illersorneqarnissaat pillugu nunat tamalaanut inatsit.	Qinnuteqartup Polarkodi pillugu ilisimasaminik atuisinnaassaaq.	Qinnuteqartup soraarummeernerup ingerlanerani Kalaallit Nunaata imartaani umiartornermik paasisimasaqarluni takutitsisinnaassaaq.

Qulaani normut uunga innersuutaapput IMO Resolution A. 960(23), immikkoortoq 7.

Innersuussinerit:

IMO Resolution A. 960(23), immikkoortoq 7.